

Službeni glasnik BiH, broj 12/04

Na osnovu člana IV.4, a) i e) Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma održanoj 12. februara 2004. i na sjednici Doma naroda održanoj 6. aprila 2004. godine, usvojila je

ZAKON

O IZMJENAMA I DOPUNAMA ZAKONA O SUKOBU INTERESA U INSTITUCIJAMA VLASTI BOSNE I HERCEGOVINE

Član 1.

U Zakonu o sukobu interesa u institucijama vlasti Bosne i Hercegovine ("Službeni glasnik BiH", broj 16/02) vrše se sljedeće izmjene i dopune:

U članu 3. tačka 1.b), mijenja se i glasi: "Bliskim srodnikom" smatraju se bračni i vanbračni drug zvaničnika, dijete, majka, otac, usvojitelj, usvojenik, njegov brat, sestra, te roditelji i dijete bračnog druga (pastorak/pastorka).

U članu 3. tačka 1. c) alineja 3. mijenja se i glasi: "sekretari oba doma i sekretar Zajedničke službe Parlamentarne skupštine BiH".

U članu 3. tačka 1.c) alineja 4. koja glasi: "direktori, zamjenici i pomoćnici direktora organa državne uprave, agencija i direkcija, te zavoda imenovani od Savjeta ministara BiH ili Parlamentarne skupštine BiH, odnosno Predsjedništva BiH", prebacuje se u tačku 1.d) člana 3. iza trenutno postojećeg teksta, s tim da se ovaj tekst na kraju rečenice dopunjuje riječima: "koji nisu obuhvaćeni Zakonom o državnoj službi u institucijama BiH".

Član 2.

Član 4. tačka 2. mijenja se i glasi: "Članstvo u poslovodnom, upravnom ili nadzornom odboru, ili direkciji, ili dužnost direktora Agencije za privatizaciju nespojivi su sa javnim dužnostima izabranog zvaničnika, nosioca izvršne funkcije ili savjetnika".

U članu 4. dodaje se nova tačka 5. koji glasi: "Odredbe tačke. 4. u vezi sa tačkom. 1. ovog člana ne odnose se na kategoriju bliskih srodnika: brat i sestra u slučaju javnih preduzeća na kantonalnom i općinskom nivou vlasti."

Član 3.

Član 5. tačka 2. prva rečenica, mijenja se i glasi: "Izabrani zvaničnici, nosioci izvršnih dužnosti i savjetnici ne mogu biti članovi poslovodnog, upravnog ili nadzornog odbora, ni direkcije, niti direktori Agencije za privatizaciju".

U zadnjim rečenicama tačaka 1. i 2. člana 5. riječi: "godinu dana" se mijenjaju riječima: "šest mjeseci".

Član 4.

U članu 10. tačka 2. tekst: "50 KM" mijenja se i glasi: "100 KM".

Član 5.

U članu 11. tačka 1. tekst: "ne smiju vršiti dužnost u drugim izvršnim organima" mijenja se i glasi: "ne smiju vršiti drugu izvršnu dužnost".

U članu 11. tačka 1. druga rečenica koja glasi: "Istovremeno vršenje više od jedne dužnosti u izvršnim organima također je nespojivo", briše se.

U članu 11. na kraju tačke 1. dodaje se rečenica: "Iznimno od prethodnih odredbi, izabrani zvaničnici, nosioci izvršne funkcije i savjetnici mogu obavljati izvršnu dužnost u fondacijama i udruženjima, koje se ne finansiraju iz budžeta bilo kojeg nivoa vlasti, osnovanim u skladu sa Zakonima o udruženjima i fondacijama."

U članu 11. tačka 2. mijenja se i glasi: "Izabrani zvaničnici, nosioci izvršne funkcije i savjetnici mogu obavljati poslove u javnim nastavnim, zdravstvenim ili naučnim, te kulturnim i sportskim ustanovama, nevladinim neprofitnim organizacijama, fondacijama i udruženjima, koje se ne finansiraju iz budžeta bilo kojeg nivoa vlasti, pod uslovima utvrđenim entitetskim Zakonom o radu i drugim propisima."

Član 6.

U članu 20. tačka 1. i tačka 3. u dijelu u kojem se nabrajaju članovi koji se krše dodaje se broj "11".

U članu 20. tačka 3. u dijelu u kojemu se nabrajaju članovi koji se krše brišu se brojevi "1. i 7.", a u članu 20. tačka 2. ispred broja 9. u dijelu u kojemu se nabrajaju članovi koji se krše, dodaje se broj "7".

U članu 20. tačka 3. na dva mjesta tekst: "u državnoj upravi" mijenja se i glasi: "u državnoj službi", kao i tekst: "u državnu upravu" mijenja se i glasi: "u državnu službu".

Član 7.

Ovaj Zakon stupa na snagu 8. dana od dana objavljivanja u "Službenom glasniku BiH".

PS BiH broj 23/04
6. aprila 2004. godine
Sarajevo
Predsjedavajući
Predstavničkog doma
Parlamentarne skupštine BiH
dr. **Nikola Špirić**, s. r.

Predsjedavajući
Doma naroda
Parlamentarne skupštine BiH
Mustafa Pamuk, s. r.